



Fletinformacion për vizitat e mbrojtësve

Ky fletinformacion përshkruan në formë të përmbledhur procedurën për organizimin e vizitave të mbrojtësve me të paraburgosurit në objektin e paraburgimit të Dhomave të Specializuara të Kosovës ('OP') që gjendet në burgun holandez PI Haaglanden, në Sheveningen ('burgu').*

Parime të përgjithshme

Mbrojtësve dhe bashkëmbrojtësve të të paraburgosurve u miratohen vizita të rregullta. Anëtarët e ekipit të mbrojtjes të cilët janë të miratuar në përputhje me Direktivën për Mbrojtësit mund të shoqërojnë mbrojtësin ose bashkëmbrojtësin gjatë vizitës me të paraburgosurin.

Vizitat e mbrojtësve janë të privileguara. Ato kryhen brenda rrezes së shikimit, por jo brenda rrezes së dëgjimit të drejtpërdrejtë apo të tërthortë të oficerëve të paraburgimit.

Vizitat dhe komunikimet e mbrojtësve rregullohen me [Rregulloren e Paraburgimit](#) dhe me udhëzuesit e punës dhe udhëzimet përkatëse, ndër të cilat:

- [Vizitat dhe komunikimet e mbrojtësve](#);
- [Rregullorja e brendshme](#);
- [Kushtet e sigurisë për hyrje në objektin e paraburgimit](#); dhe
- [Sendet dhe substancat e ndaluara në objektin e paraburgimit](#).

Organizimi i vizitave

Kontakti

Pyetjet në lidhje me procedurën e organizimit të vizitave mund t'ia drejtoni zyrës së administrimit të Njësisë së Paraburgimit ('zyra e administrimit') në adresën elektronike visitors-DMU@scp-ks.org.

Planifikimi i vizitave të mbrojtësve

Orari dhe kohëzgjatja e vizitës së mbrojtësit planifikohen paraprakisht në marrëveshje me shefin e paraburgimit. Vizita e mbrojtësit mund të planifikohet përmes zyrës së administrimit. Gjatë planifikimit të vizitës, mbrojtësi duhet të njoftojë paraprakisht zyrën e administrimit në qoftë se në vizitë do të ketë të pranishëm edhe anëtarë të tjerë të ekipit të tij.

Në bazë të këshillave të mjekut, Administratori ose shefi i paraburgimit mund të vendosin masa për mbrojtjen e shëndetit publik me qëllim mbrojtjen e shëndetit të të paraburgosurve dhe të personave të tjerë në objektin e paraburgimit. Mbrojtësi informohet para vizitës për masa të tilla.

Vizitat përmes videolidhjes

Vizitat përmes videolidhjes u ofrojnë të paraburgosurve një mundësi shtesë për të komunikuar me mbrojtësit e tyre në qoftë se vizitat personale në objektin e paraburgimit mund të përbëjnë rrezik për shëndetin e tyre. Procedura e organizimit të vizitave të mbrojtësve përmes videolidhjes përshkruhet në [Udhëzimin e Zyrës Administrative për Vizitat përmes Videolidhjes](#).



Ditët dhe orari i vizitave

Vizitat e mbrojtësve mund të kryhen midis orës 9:00 dhe 16:45 nga e hëna në të premte.

Në qoftë se një i paraburgosur nuk mund të takojë mbrojtësin e vet gjatë orarit të rregullt të vizitave, në raste të veçanta shefi i paraburgimit mund të autorizojë vizitë jashtë këtij orari dhe ajo organizohet sipas kushteve të posaçme.

Ndihma në marrjen e vizës shengen

Disa mbrojtësve mund t'ju duhet vizë shengen për hyrje në Holandë. Pyetjet në lidhje me procedurën e marrjes së vizës dhe hyrjes në Holandë mund t'i dërgohen shefit të Zyrës së Mbrojtjes si personi i kontaktit për të gjithë mbrojtësit, në adresën elektronike: defencecoordination@scp-ks.org.

Kushtet e hyrjes

Kontrollet e sigurisë

Për të hyrë në burg dhe në objektin e paraburgimit, mbrojtësi dhe anëtarët e ekipit të tij duhet t'u përmbahen kushteve të sigurisë. Në përgjithësi, çdo person që kërkon të hyjë në objektin e paraburgimit duhet:

- të paraqesë dokument të vlefshëm identiteti, si për shembull pasaportën ose letërnjoftimin e shtetit përkatës;
- të japë pëlqimin për t'u kontrolluar; dhe
- t'u përmbahet masave përkatëse në lidhje me sigurinë.

Procedurat dhe kontrollet e sigurisë kryhen në mënyrë që respekton materialet e përfshira në konfidencialitetin e komunikimit mbrojtës-klient. Informacion më të hollësishëm në lidhje me masat përkatëse të sigurisë do të gjeni në udhëzimin për [Kushtet e Sigurisë për Hyrje në Objektin e Paraburgimit](#).

Sendet dhe substancat e ndaluara

Mbrojtësit nuk lejohen të sjellin sende ose substanca të ndaluara në burg dhe në objektin e paraburgimit, përfshirë telefonat mobilë dhe pajisjet USB (p.sh., kartela për memorie të bartshme (*flash drives*)). Listën e plotë do ta gjeni në udhëzimin mbi [Sendet dhe Substancat e Ndaluara në Objektin e Paraburgimit](#).

Sende të nevojshme për përgatitjen e mbrojtjes

Të paraburgosurit dhe mbrojtësit mund të sjellin në burg dhe në objektin e paraburgimit disa materiale për përgatitjen e mbrojtjes, sikurse përcaktohet në rregullën 26 të Rregullores së Paraburgimit.

Gjatë vizitave, mbrojtësit zakonisht mund të sjellin kompjuterët e tyre të bartshëm (laptop) dhe të shkëmbejnë dokumente fizike drejtpërsëdrejti me të paraburgosurit, përveç nëse janë në fuqi masa të mbrojtjes së shëndetit publik me qëllim mbrojtjen e shëndetit të të paraburgosurve dhe personave të tjerë. Mbrojtësi informohet për masa të tilla para vizitës së planifikuar. Mbrojtësi gjithashtu informohet edhe për mënyra alternative të shkëmbimit të materialeve të përfshira në konfidencialitetin e komunikimit mbrojtës-klient.



Në qoftë se dëshiron të sjellë materiale në format digjital për të paraburgosurin ('sjellje') ose të marrë materiale në format digjital nga i paraburgosuri ('nxjerrje') për nevojat e përgatitjes së mbrojtjes, mbrojtësi duhet të ndjekë procedurën e paraparë për shkëmbimin e materialeve të përcaktuar në [Rregulloren e Brendshme](#). Sendet regjistrohen dhe konfidencialiteti i komunikimit mbrojtës-klient respektohet. Në këtë mënyrë mund të sillen edhe CD ose DVD të zbrazëta, me kusht që paraprakisht të regjistrohen. Për ta pasur më të qartë, mbrojtësit do t'i jepet një listë e materialeve në formë digjitale sjellja ose nxjerrja e të cilëve lejohet.

**Ky dokument është vetëm një përmbledhje informacioni në vija të përgjithshme dhe nuk përbën dokument ligjor. Për një pasqyrë të plotë të rregullave në lidhje me vizitat e mbrojtësve, mbrojtësit këshillohen të konsultojnë Rregulloren e Paraburgimit dhe udhëzuesit e punës dhe udhëzimet përkatëse (www.scp-ks.org).*